

東
華
續
錄

東華續錄

同治三

臣王先謙敬編

臣張式恭恭校

十一月乙酉朔

上奉

母后皇太后

聖母皇太后御養心殿

垂簾聽政○予直隸陣亡知縣范守恆等祭葬世職○丙戌諭內

閣駱秉章奏剿辦略坪股匪大獲勝仗見籌進剿情形一摺四川

自綿州解圍後藍逆勢益窮蹙餘匪尙盤踞羅江之略坪場等處

滋擾八月十九日已革副將唐友耕派隊進攻將花花場賊壘六

座全行燒毀唐友耕督勇截殺遊擊白鳳鳴等由中路直撲賊營

將略坪一帶賊營燒毀淨盡追殺二十餘里餘匪會合藍逆餘黨

分竄什邡之李家碾崇甯縣之花園場我軍跟蹤追剿餘匪紮筏

渡河分踞崇慶州之石羊場等處九月初九日總兵胡中和等搶

過河岸將馬祖寺一帶賊匪全行剿滅並將范家橋拒匪擊敗追及石羊場共斃賊萬餘人生擒一千三百餘名殘匪併趨丹棱竄合眉州李逆巨股著駱秉章分飭各軍迅速進攻盡殄醜類毋畱餘孽在事出力員弁勇丁著駱秉章擇尤保奏候朕施恩○諭前因四川軍務未竣需才孔亟特將劉蓉賞給三品頂帶署理四川布政使茲據駱秉章奏該員呈稱墨纓入仕恐悖禮經請俟服闋後接篆等語四川布政使著毛震壽暫行兼署劉蓉俟明年正月服闋後該督卽飭赴任○諭總理各國事務衙門奏習教人眾請分別良莠飭令地方官妥爲辦理等語據稱法國條約內載天主教原以勸人行善爲本揆其勸善之意與釋道同是以康熙年間曾經准行惟近來各省習教之人與不習教者往往彼此齟齬若不持平辦理殊不足以昭公允著照所請嗣後各該地方官凡交

涉習教事件務須查明根由持平辦理如習教者各係安分守己謹飭自愛則同係中國赤子自應與不習教者一體撫字不必因習教而有所刻求儻或倚恃教民不守本分干預別項公私事務或至作奸犯科霸地抗租欺侮良民則不獨爲中國之莠民亦卽係伊教中之敗類必應照例治罪決不能因習教而少從寬假各該地方官務當事事公平分別辦理以示撫綏善良之至意○諭議政王軍機大臣等毛鴻賓奏黔匪由來鳳攻撲龍山石逆大股竄楚見在分籌防剿並將江忠義暫畱湖南俟楚境肅清再赴署任各等語石達開見已闌入湖南臨口雙江等處且值龍山竄匪尙未撲滅設令互相勾結則西伺川南東窺江右均屬可慮毛鴻賓已派江忠義劉培元等水陸官軍剿辦卽著督飭在事將弁確探賊蹤實力兜擊惟醜類甚眾自應亟籌協剿卽著田興恕劉長

佑調派得力官軍與湖南兵勇會合夾擊其龍山股匪見經毛鴻
賓調撥鎮筸兵練往剿並著速籌掃蕩至石逆垂涎蜀省已久江
西爲該逆熟徑著駱秉章毓科嚴飭邊界地方文武於各要隘嚴
密防堵相機籌辦著貴州巡撫江忠義著俟湖南軍務稍平卽行
赴任將此由六百里各諭令知之○丁亥諭內閣前因少詹事許
彭壽御史林壽圖先後奏戶部五字鈔票各案株連太甚請飭清
理當經降旨令刑部詳審案情分別擬結茲據該部奏稱戶部五
字鈔票一案係由載垣一人主見專務羅織案內人證均由宗人
府密札查傳收禁空室獨自研訊不令該部堂司各官聞知見在
審明按律定擬此案已革商人張兆麟馬錫祿均充官號商人所
虧錢票卽屬官物無論在官在民其爲侵吞肥己貽累商民罪無
可追張兆麟馬錫祿著照監守盜倉庫錢糧一千兩以上例斬監

候秋審入於情實事犯雖在恩詔以前不准援免仍勒限一年全完已革工部主事李椿育國子監教習錢紹昌輒因希圖酬謝向王正誼情託本有應得之罪惟在恩詔以前准其援免均仍著革職卽行釋放戶部筆帖式薩炳阿舉薦商人進局業已另案革職著毋庸議降捐州判前任大興縣知縣賀廷鑾於 特旨派辦要

案未能審出實情辦理朱洪陞查封繳官款項一事兩歧且於戶部飭令開封變價解部之項未經追價報解並失察家人撞騙得贓均難辭咎業已革職亦毋庸議暫行革職前任科布多參贊大臣熙麟甘肅鎮迪道崇保江蘇候補道忠廉訊無徇私受賄情事惟開設字號未能慎重究屬疏忽均著開復原官交部議處並飭令回任聽候部議商人劉洪振白亮並無侵蝕肥己情事惟招商開設字號辦理不慎羅萬象薦舉字商亦有不合姑念市井小民

無知犯法均著免其置議已革內務府主事存印訊無別情已革監生葛玘代伊兄葛鏞轉賣糧石訊係不知私那官項及情託等事存印著開復原官葛玘著開復監生均卽釋放已革戶部郎中王正誼已革御史前任戶部郎中台斐音係總辦掌印司員於商人虧欠帑項改作私款蒙混入奏厥咎甚重惟據王正誼台斐音並已革司員李守愚榮溥吳廷溥李壽蓉等供稱九號存票實係買賣私項與正項毫無干涉該革員等先後任並無虧短肅順派員辦理奏銷任意牽混顛倒送到冊籍多係駕空誣陷非眼同覈算不能清楚等語王正誼台斐音李守愚榮溥吳廷溥李壽蓉均著卽行取保飭令前赴戶部覈算並著派萬青藜愛仁會同戶部堂官派員督同原委各員及經手書吏嚴加覈算秉公定擬其查封之鄧文槐等家產見在尙未結案暫緩給還外熙麟崇保忠廉

孟來喜劉洪振白亮及已故之石景蓮並宗人府查封之徐姓均
訊無贓私情弊范活庵胡麗南沈慶松李椿育錢紹昌僅止情託
陳燾夏錫範薩炳阿因人連累所有查封家產均著卽行給還以
昭平允○諭田興恕奏石阡等處勦賊獲勝等語苗匪由施秉等
處窺伺石阡府城經總兵劉義方等合力兜勦攻克濫泥山要隘
踴毀賊營該匪竄逸石阡餘慶境內漸次肅清勦辦尙爲得手著
田興恕乘此聲威激勵將士節節掃蕩毋畱餘孽○調載齡爲吏
部左侍郎以載崇爲刑部右侍郎由內閣學士遷○調崇綸爲工部左侍
郎以德全爲倉場侍郎○戊子諭內閣都興阿奏官軍截擊天長
六合竄匪獲勝並下游水師肅清江面一摺天長踞逆出竄秦欄
六合逆匪擾至金家集等處築壘屯糧經都興阿督飭總兵詹啟
綸記名副都統海全杜嘎爾各率所部馬隊馳抵大儀秦欄踞匪

列隊迎拒營總富勒慶阿等由上下游繞渡鈔擊海全由中路衝殺逆勢不支我軍乘勢痛剿斬殺殆盡其金家集逆匪經副將孫文友等分路兜擊將逆壘二座同時攻破至下游之匪經總兵周希濂督帶艇船會合吳全美派往礮船攻入河內擊沈賊船數隻該匪併竄超飄六洲等處石橋灣一帶一律肅清該逆雖疊受懲創難保不復萌窺伺著都興阿督飭將士妥爲布置以固江北藩籬○諭馮子材奏逆黨復踞馬陵經官軍擊剿獲勝一摺馬陵逆匪經官軍擊敗後遁回寶堰復合羣賊麇集馬陵意圖撲犯鎮城經馮子材派令副將文龍德等直擣馬陵參將田慶和等鈔出賊後先擊花村之賊阻其接應文龍德等將及賊巢該逆列陣迎拒我軍槍礮齊施斃賊不計其數參將田慶和等亦在花村與賊接仗該逆恃眾分股包裹我軍奮力衝擊槍礮並發賊始驚潰馬陵

之賊亦被文龍德田慶和等合軍追襲共斬獲長髮首級七十餘
顆勦辦尙屬得手著馮子材督飭各將弁奮力進勦節節掃蕩以
靖逆氛○河南巡撫嚴樹森奏金樓踞匪負隅自固與毫東捻股
勾結分我兵力經臣毛昶熙疊飭副將圖塔納等於九月初八日
進攻賊寨寨中出賊數百人蠡擁衝撲該副將等督率勇團乘隙
進攻賊匪腹背受敵立即潰回各隊衝過賊濠斃匪多名賊匪奔
入寨內十一日賊寨東西兩門各出馬步賊數百餘人敖天印等
先將西門之賊壓回其東門之賊直撲我軍亦經邵春仁等陣斬
數千名該匪屢被勦敗閉門堅守復經臣毛昶熙添派尹耕雲馳
赴前敵紮營環逼四面合圍二十一日該匪突出衝撲營盤官軍
奮力擊殺斃賊百餘名二十三日尹耕雲等督率馬隊馳繞寨南
施放火器守備尹彥欽復於寨北然放大礮轟斃守垛之賊不可

數計該匪拒守益力二十四日復密令諸將乘夜劫寨各隊進越重濠尹耕雲等飛調各營槍礮環施轟擊守牆賊匪陳祿興蔣東才等揮兵仰攻忽東門突出悍賊數百人欲鈔我軍後路陳祿興乘勢揮眾直抵東門截賊歸路蔣東才回矛奮擊將賊偪入濠內刀砍矛刺悉數殲殪統計斃賊數百餘人十月初三日邵春仁親督兵練負土填濠奮力進攻忽據報毫東捻逆蘇添才劉老淵宋濬沅立稜眼李庫等糾賊數萬人圖援金樓勢甚猖獗並圖攻馬牧集斷我餉道當經毛昶熙傳諭圖塔納派敖天印等紮營金樓寨外堅壁勿動抽調蔣東才各隊回駐馬牧集賊匪旋撲金樓營盤敖天印等奮力鏖戰擊斃捻匪數百名立將大股壓退十四日敖天印等乘勝蹋破花旗賊營並平毀土山後賊壘共殲斃悍賊千餘名是日賊騎數百進撲歸德外城知府祝壇飛調民團會合

馬步各隊將賊擊退其大股仍在馬牧以南盤踞圖攻歸德府城
臣與毛昶熙見飭帶兵將弁駐紮馬牧力保宋郡復飭東路各州
縣嚴防要隘一面飭調鄉團四面兜剿以扼西竄 上諭議政王
軍機大臣等溶滑淇汲等處竄匪由開州交界之井店出境回竄
長垣圖歸濮范老巢惟直東之間各匪充斥西竄固須力扼而北
犯尤宜嚴防著嚴樹森卽飭駐紮馬牧各軍會合毛昶熙派出之
兵迅將毫東援賊擊退保護歸德郡城並飭派出總兵牛浩然於
彰衛一帶探有警信卽渡河截剿勝保駐兵直境當此匪蹤徧地
惟當嚴飭將弁認真剿洗以清畿輔門戶勿令蔓延爲患譚廷襄
身膺疆寄責無旁貸並著督飭各該文武妥實籌防東豫沿河賊
蹤紛竄如令偷渡北犯恐該大臣等不能當此重咎也將此由六
百里各諭令知之○嚴樹森奏平輿一帶伏莽互相勾結四出剽

掠臣壘飭帶兵司道等殄除兇黨直擣賊巢據臬司鄭元善等稟報該逆陳大禧負固平輿我軍加築前敵營盤步步進逼都司周登高等疊次進擊斬馘甚夥我軍逼平輿而壘惟南路正陽捻首張瀾林等勾結匪徒徧脅民寨與陳大禧勾通一氣經鄭元善派知府彭鍾等督勇擊退乘勝追剿毀其踞寨查該匪大股在正陽縣銅鍾一帶與平輿之賊互相犄角到處劫掠等情當經臣飛飭鄭元善等抽撥數隊馳往剿辦仍飭道員張曜統帶各軍進紮規取平輿十月初一二等日營總蘇謙等會同正陽各團先後出隊獲賊三十餘名訊明正法初三日捻首張瀾林等糾合各捻大股麇至約萬餘人合力抗拒我軍更番出戰斬馘多名初七八等日疊有殲擒十二日我軍出隊至宋圩迤東該捻大股來撲我軍奮力迎剿賊勢不支棄械而遁馬步追殺三十餘里共計斃賊一千

餘名生擒百餘名解散脅從無算餘匪竄往陡溝一帶見在仍飭各帶兵官及地方府縣認真勦辦毋稍鬆勁報聞○己丑賜馬鴻圖等二十五人武進士及第出身有差○諭內閣田在田奏收復宿州東西各圩進攻元縣匪巢疊獲勝仗一摺宿州周家圩等處擒首楊文煥等負固抗拒經副將龔耀綸等分投勦辦斃匪多名圩內逆匪窮蹙將該逆之弟楊文秀及各擒首獻出訊辦餘眾雍髮投誠東西兩路各圩次第收撫元縣匪首王雲謫勾結擒逆進攻邱家寨等處經參將滕自新等力勦解圍乘勝赴張家洲搶進賊圩生擒老擒五名殺斃焚斃淹斃二百餘名東路之賊由靈璧宿州交界地方向西奔竄經總兵胡元昌於紫路湖一帶攔截衝殺另股黑旗逆匪復由欄杆山至鶴山盤踞四十餘里經都司王斌等督帶團練先後截殺由埇邱追至濰河斬馘甚多勦辦尙爲

得手著田在田督飭各軍力圖進剿毋畱餘孽○諭議政王軍機大臣等勝保奏見議招撫捻首並遵籌苗練剿撫事宜請專責成而防媒孽各等語捻首劉占考一股既經該大臣派委大順廣道王榕吉等前赴濮州議撫卽著酌度情形如該捻首真心向善並無反覆自應准其投誠以省兵力惟此股人數較多受撫以後如何分別遣散安插務須飭該道等妥籌萬全至所稱苗練之應剿應撫惟在臨時決策竊慮濮范河口一帶大股各匪妥爲辦理後卽可統師南下馳赴蘇州所籌均極周密該大臣督師有年於各路軍務俱能認真籌辦以酬皇考大行皇帝倚畀厚恩另片瀝陳各情足見該大臣立心謹慎自後惟當勉益加勉事事但求可以自信於心不必求諒於人朕旣委以重任亦斷不至惑於浮言也見在濮范一帶匪勢甚熾北犯尤爲可慮卽著督飭將士實力

剿捕毋令紛竄一俟直境肅清東省匪徒悉就殲滅該大臣卽當督兵赴皖所請明降諭旨以專責成應俟居時再行酌辦另片奏兵食無措請撥餘存漕米接濟等語天津縣徵存漕米除已交幫外下餘漕米四千餘石尙存漕次著准其運交勝保軍營以濟兵食將此由六百里諭令知之○諭賈臻奏捻首葛大牛並張落刑弟姪等俱赴苗寨苗沛霖有俟勝保到皖卽行就撫並將投赴苗寨之隨州敗匪派令攻打宋圩請飭彭玉麟進援潁阜等語苗沛霖心懷反側勢日鴟張雖口稱待撫而攻奪附近各圩焚掠自如勝保見難分身赴皖淮北地方兵力較單曾國藩彭玉麟均有地方之責著卽迅速籌商由彭玉麟統帶楚師馳赴潁阜一帶嚴扼北路要隘如果苗練萬不可撫卽與駐紮霍六楚軍分路進攻並約會袁甲三李世忠各軍東西夾攻爲一鼓殲除之計前有人奏

候補運司金安清與薛煥拜認師生侵蝕糧餉已諭會國藩秉公查奏茲復有人奏金安清在泰州令人向伊捐貲投效方得差委牟利者爭相賄賂委員及職員生監奉委者各至百數四出需索民不聊生指捐營私富戶小民均被勒派等語裏下河地方逼近賊氛豈可復令劣員肆虐居民以致人心搖動著會國藩嚴密確查彙併前案據實參辦原摺著鈔給閱看將此由六百里各諭令知之○諭苗練與粵捻等匪互相勾結已無就撫之理所稱俟勝保到皖卽當相攜納款正其用心叵測之處見在濮范匪勢甚熾直東交界防剿喫緊勝保卽能前往亦復有需時日彭玉麟雖屢經催令赴皖惟該撫統帶水師與楚軍會剿粵逆能否得有替人尙未可定苗逆窺伺潁州已久賈臻身任地方責無旁貸著就見有兵力實力防剿不得專待勝保致滋貽誤並不得以該郡並無

重兵以及從事戎行精力不及等詞任意推諉儻有疏虞惟該署撫是問將此由六百里諭令知之○庚寅諭內閣御史朱潮奏請飭各路軍營保舉將材並起用告病人員各摺片見在軍務未竣前經 皇考大行皇帝通諭各直省督撫及各路統兵大臣訪察堪勝將帥之任者據實保奏送部引見見在遵 旨保奏者尙屬寥寥值此時勢多艱各省軍營將驕兵惰非有經濟非常之士何能申明紀律克奏膚功近來帶兵各員雖一介寒賈之士但能勦賊立功無不蒙 皇考大行皇帝破格錄用此外或巖棲谷隱莫能周知或下吏偏裨末由自達各路統兵大臣及各督撫果能虛心物色亦何地無才患在膜視時艱非徇私濫保卽苟且塞責而眞才不出耳著各統兵大臣及各該督撫畱心諮訪如軍營將弁中有謀勇出眾並有僻處山林熟諳韜略堪備干城之選者均著

不拘資格據實保奏候朕簡用其有濫保庸才以盜襲虛聲之人
謬登薦牘將來或致失機僨事朕惟原保之人是問至因病乞休
打仗受傷人員未必無尙堪起用之人並著中外大吏舉其久歷
戎行實孚輿論無論曾任見任或任用未竟其長者奏請擢用以
副朕整飭戎行至意將此通諭知之○諭議政王軍機大臣等伯
彥訥謨祜祖母年老病重已賞假回牧省視矣因念僧格林沁爲
國宣力移孝作忠見當屢次大捷勦辦得手之時自未便頃刻離
營既有伯彥訥謨祜回牧省視該大臣卽可專心戎事以期迅奏
膚功克膺懋賞朕有厚望焉將此諭令知之○辛卯諭議政王軍
機大臣等江南地方被賊橫踞惟京口一城孤立江濱賊氛四逼
與江北相依唇齒而爲江南之咽喉見在寶堰白兔等處賊黨麇
集數萬聞該城一載以來得以固守無虞者皆由巴棟阿與馮子

材調度合宜旗綠兩營聯爲一體所以防剿無誤見在魁玉已到
鎮城雖係專轄旗營而與馮子材所帶綠營官兵必得相聯臂指
方能所向有功著魁玉馮子材嗣後軍務緊要務須遇事和衷會
商辦理使旗綠兩營仍聯一體不得彼此心存畛域致誤事機將
來海全到任後亦必應查照巴棟阿一切舊章辦理該副都統總
兵等同辦一事當此軍務萬緊必當共矢公忠同心勦力克保危
城本日又據魁玉奏稱請將已革協領賞還頂帶責成辦理錢糧
等語鹿鳴經前署將軍巴棟阿以玩違軍令奏參革職永不敘用
著都興阿就近確查該革員鹿鳴是否因公有無可追據實奏聞
再降諭旨至都興阿駐軍江北與京口輔車相依該處軍務情形
亦應隨時關照毋使疏虞將此由五百里各諭令知之○河南巡
撫嚴樹森奏查毛昶熙自上年督辦團練以來於練勇築寨事宜

無不悉心規畫督率紳耆及地方有司實力經理大河以南開歸
陳許南汝光河陝汝等府州屬團練一律整齊每遇賊警悉有斬
獲此卽督辦得宜之明效大驗也惟彰衛懷三府屬近有不逞之
徒藉團練爲名聚眾抗糧以直東匪徒時懷窺伺外寇未除內
患須防臣在陳州時與毛昶熙往返函商擬將河北三府團練暫
緩辦理藉以嚴催錢漕以裕餉源毛昶熙籍隸河北洞悉情形深
以臣言爲不謬且該員鄉評允洽爲士民所畏服一經示禁人莫
敢違近來該三府錢漕漸有轉機尙未聞聚眾抗糧之事此又操
縱得法確有把握之明證也至毛昶熙實力任事虛心求才近將
宋防各軍會同臣逐加整頓擊勦皖捻先後數十戰皆能獲捷以
目下情形而論豫省團練事宜固應藉資熟手卽宋防一路仍應
責令該員幫辦免臣顧此失彼相應籲懇 天恩俯准以毛昶熙

仍畱河南督辦團練兼幫辦軍務以固邊防又奏直東之間捻蹤充斥河之東西皆有匪眾緊接豫疆朝發夕至見飭河北鎮總兵牛浩然帶本標兵丁回紮河朔復調集官兵一千名駐紮滑濬之交嚴密防堵並派精勁楚勇一千名駐紮北岸陳橋策應牛浩然一軍兼撥省防楚勇一千名移紮南岸與北岸之軍夾河而壘以固省防毛昶熙駐軍宋郡當豫皖之交刻下金樓賊寨尚未攻克宋濬沅等大股意圖西犯姜白凌等竄匪勢已東趨在在均形喫緊蒙毫諸捻悍於東匪穴東防勦急於河朔是臣毛昶熙一軍關繫省東門戶萬難擅離自應仍駐宋郡以資扼守至河北人心浮動易聚難散不逞之徒往往藉團練而抗差抗糧咸豐五年河北聯莊會匪滋事可爲前鑒豫中以河北三府爲餉源所出詎可再令滋事相應請旨緩辦河北團練以杜弊端其河北防堵事宜卽

由臣督飭將弁相機辦理

上諭濮范竄豫匪徒前經嚴樹森派

兵北渡該匪聞風遁回老巢惟直東接壤處所匪眾充斥見值漕糧催兌不可不先爲防範該撫業已調派牛浩然督帶標兵回駐河朔並調兵一千名紮滑濬之交著卽責成該總兵妥爲彈壓毋得稍有疏虞其南北兩岸防河楚勇二千名並著該撫相機調遣堵剿兼施以固疆圉而護全漕至河北三府團練著卽照該撫所議暫緩糾眾抗糧易滋流弊所有河北三府團練著卽照該撫所議暫緩辦理毛昶熙督辦該省團練著有成效見在駐軍宋郡防剿正當喫緊著仍畱豫省督辦團練以專責成宋防各軍業經該撫等實力整頓其一切軍務並著會同毛昶熙妥籌辦理如能和衷共濟是有幫辦之實不必顯有幫辦之名該撫仍不得以分任有人稍存推諉本日有人奏請將東豫兩省被擾地方錢糧分別蠲免以

蘇民命著嚴樹森遴派妥員會同地方官前往履勘據實具奏又片奏嚴樹森尙知吏治惟督辦勦匪未能盡善本年八月閒省城被圍該撫盡驅商紳民丁上城防守所有兵勇任令閒游鋪戶按月捐貲練勇歸於何用且民丁多係小戶貧人並不發給口糧勒令晝夜巡邏人人怨憾請飭在籍前安徽布政使張光第署祥符縣知縣朱光宇等將從前捐項造冊報部覈實稽查等語並著嚴樹森確切查明有無此等情事迅速覆奏毋稍迴護原摺片著鈔給閱看將此由五百里諭令知之○以採買洋米延不覆奏兩廣總督勞崇光廣東巡撫耆齡鑄級○召前任副都統富明阿來京講求京旗各營訓練事宜○壬辰定 大行皇帝山陵名曰 定陵○諭內閣我朝深仁厚澤浹寰區軫念民依無微不至偶遇水旱偏災疆臣入告無不立沛恩施其被賊擾害地方小民蕩析

離居情形尤慘各該省督撫大吏自能仰體朝廷子惠痼瘵之隱隨時查勘分別奏請蠲緩惟是奸猾吏胥從中舞弊往往恩詔雖頒有遲至數月而始張貼者有先徵錢糧而後張貼者在國家屢頒寬大之恩而閭閻難沐纖毫之惠屯膏壅澤皆不肖有司階之厲也嗣後遇有蠲緩恩旨該省督撫當卽趕緊刊刻謄黃嚴飭各州縣隨到隨貼務使實惠均霑家喻戶曉如有視同具文及任意壓擱致令朝廷澤不下逮一經發覺朕必重治其罪以爲玩視民瘼者戒○勝保奏教匪句結陽范土捻各匪眾逾數萬屯踞莘朝一帶築圩抗拒以竹口蓮花池爲其分紮應援之所而以延家營爲老巢周圍十五六里白蓮教匪從尙選亦住圩中與教首延翰秀從侍明糾約各股教匪臣思該圩占地旣廣聚賊尤眾尙有良民萬餘在內若進攻時一律誅殺民賊不分辦理亦覺過當因先

期張貼告示並射入圩內不願從賊者限三日內逃出以免玉石俱焚連日被脅良民乘夜逃出者數千臣飭總兵成祿等統帶馬步隊於十一月初三日分路圍剿匪眾開礮迎拒我軍亦開礮轟擊斃匪數十名乘勢搶至濠邊各軍奮勇直前將賊圩西北面攻破大隊踰濠而進肉薄齊登圩內伏匪猶爲困獸之鬪我兵短兵相接巷戰兩時擒斬尤眾圩內房屋一律焚毀該逆向南面圩門尋路狂奔馬隊官兵跟蹤追殺生擒賊首延輪秀從侍明正法共計斃賊數千名奪獲羸馬槍械輜重無算延家營附近村莊潛匿之賊殲殺殆盡救出被脅男婦二三千人餘匪向南逃遁臣惟有督飭官軍相機前進以期盡殄寇氛上諭山東敎匪勾結陽范土捻各匪於莘朝一帶築圩抗拒以延家營爲老巢經勝保先期解散脅從旋飭總兵成祿等分路進攻殺賊不計其數生擒逆首

延秀輪從侍明二名訊明正法當將賊巢全行焚毀剿辦甚屬得手著勝保乘此聲威節節進剿盡殄賊氛毋畱餘孽○勝保奏據潁州團練紳民來營稟稱苗練自襲破壽城徧脅日甚勢益鴟張附近郡城之東南北三面各民團皆被苗練收附不下數百圩潘閣所收光固一帶練圩李道南所收霍邱一帶練圩徧地皆成苗黨卽太和潁上新隨苗練之眾亦多至百餘圩皆聲言勝保一到卽可去逆效順又稱苗沛霖占踞壽州後復受粵逆僞印見在光固境內已有粵逆肆擾等語查潁郡一城關繫皖豫兩省全局其河南之光固商息安徽之太和潁上壽鳳懷霍等州縣苗沛霖所集新舊各紳練已數百圩與粵逆捻匪雜處其中賊勢蔓延若辦理再有稽遲恐粵逆苗捻合而爲一則皖豫一帶勢成瓦解見在直東一帶匪徒經臣親督剿辦未能統師南下擬先行抽撥兵勇

派委得力大員馳往潁郡以安人心而壯先聲又奏正繕摺聞據
報國瑞帶馬步各隊業於十月二十八九等日移紮蓮花池一帶
進攻竹口賊圩查延家營老巢已爲臣攻破竹口如能得手賊卽
無屯踞之所惟是各股餘賊薈萃一處人數尙多如果兩路夾擊
該匪眾不竄向西南卽鋌走東北莘縣以東尙涉空虛沙鎮地方
雖有防兵爲數無幾恐匪眾避兵而行竄赴馬橋沙鎮一帶則卽
繞出國瑞一軍之後東昌亦復行喫重是以前次函致國瑞令其
派撥馬隊數百名扼紮莘縣以遏竄路尙未據國瑞函復如何辦
理茲探得匪眾被剿窮蹙有乘虛仍竄沙鎮馬橋一帶之說見擬
畱兵駐紮張魯集以顧南路捻氛臣卽日暫行折赴館陶調度一
切以免疏虞上諭議政王軍機大臣等苗沛霖所集新舊各練
數百圩與粵捻等匪雜處其心叵測勢燄彌張潁郡士民乞救迫

切自屬實在情形該大臣如果卽能前往乘苗練順逆之勢尙在
未定無論應勦應撫迅速妥籌辦理誠爲切要之圖第當直東一
帶教匪切近畿輔甫經勦辦得手事機更不可失該大臣勢不能
分身前往旣據奏稱先行抽撥兵勇派委得力大員馳往潁郡以
壯先聲而安眾志所辦甚合機宜見在國瑞帶兵已紮至蓮花池
進攻竹口如能得手可期與該大臣之兵兩路夾擊而匪眾被勦
四路紛竄均須布置周密方可無虞旣據奏稱畱兵張魯集暫行
折赴館陶調度諒能籌畫萬全如北路迅卽肅清該大臣自可卽
行南下統一事權酌派勦撫該大臣前奏有局外閒言每多媒孽
等語其時密封言事指劾該大臣者誠屬紛至沓來惟朕不惑於
浮言是以剴切寄諭但求無愧於心不必求諒於人以見倚任之
專該大臣如能將北路肅清苗練一事妥爲籌辦彼時卽畀之重

任不獨好言者無從指摘卽朕亦不失知人之明該大臣仍當勉益加勉毋負委任切不可必有事權方能辦理爲人所料也將此由六百里諭令知之○予安徽被戕知縣侯樞臣殉難知縣何豫綸祭葬世職○撥淮關銀一萬兩濟臨淮軍需○癸巳諭議政王軍機大臣等據袁甲三奏已將前次寄去明發諭旨交懷遠練總邵徵祥帶赴壽州相度情形再行宣示並以苗練卽暫時議撫終歸於剿俟楚師會合有期再申大義各等語苗沛霖果能薙髮歸正卽著將諭旨宣示准其立功自贖責令退出壽州懷遠兩城並將竄竄各練速行撤退該大臣仍將附近民圩趕緊收撫以孤其勢至所稱定遠一城一經克復卽可與楚師聲息相通並著責令派出官兵迅速籌辦其如何襲取來安卽責成李世忠妥爲辦理苗沛霖果願就撫袁甲三務當責以大義結以厚恩使其漸就

範圍不至再煩兵力儻首鼠兩端終於反覆則亦斷難姑息該大臣於勦撫機宜既欲兼權互用卽著相機操縱朕亦不爲遙制不必以盼望勝保前往轉致貽誤將此由六百里諭令知之○甲午諭內閣各直省州縣等官但能循良供職應令久任毋得率行更調將士衝鋒冒鎬賞罰公平方能用命各路統兵大臣務秉公保奏朕深居九重內外官工賢否尙未周知惟在議政王軍機大臣等虛心延訪畱意眞才在廷諸臣亦共矢公忠弼予郅治庶各省大吏將帥等咸得其人朕有厚望焉○諭議政王軍機大臣等寄諭欽差大臣僧格林沁有人奏侍郎國瑞恣受苞苴聲名狼藉山東官吏多拜伊門下本年五月閒在長溝大營作生日官吏多有餽送且聞有每節餽送甚厚者該省人言藉藉未必無因請飭查辦等語國瑞係海疆獲咎之員蒙 皇考大行皇帝棄取擢用飭

赴軍營應如何勉力報稱若如所奏藉軍營聲勢婪索地方官吏
納賄營私至此已極見當軍務喫緊之際正須整飭戎行豈容貪
劣之員任意掊克該大臣秉性忠直斷不以該侍郎在營日久打
仗出力稍涉迴護著卽嚴密訪查據實參奏原摺著鈔給閱看至
該大臣軍營或以該侍郎一經參劾帶隊乏人爲慮不妨於京外
各員內擇其素嫻韜略爲該大臣所深知者指名奏調將此諭令
知之○諭徐之銘每次報到無不鋪張勝仗保奏出力員弁難保
非虛辭捏飾爲見好屬員地步何有保恃練橫行人所共知且據
張亮基奏該員聽徐之銘主使縱練戕害鄧爾恆而徐之銘則將
何有保疊次請獎更難保無被何有保挾制情事著福濟於到任
後卽將該撫前奏克復富民安甯等城擊退攻撲省城回匪節次
鈔寄各摺片並此次所奏攻克易隆克復易門等情形是否屬實

出力人員應否獎勵申有謀於祿豐失守是否見賊逃遁均著詳查覆奏何有保戕害鄧爾恆有無確據並著密速查明嚴參懲辦毋稍寬縱至滇省自回匪肆擾以來軍務久未肅事地方日益凋敝徐之銘辦理未能妥協邊疆重地實深厯慮福濟接奉此旨務當星馳前進迅速抵滇將軍務及地方諸事實力整頓不得任意延玩其疊次諭令該督查辦之徐之銘貪財漁色擅殺就撫回民威逼馬椿齡自盡謀殺委員孫鈞聲名狼藉演戲宴客並夏家疇因何前赴夷寨勸捐等款均著嚴密詳查一面仍遵前旨將徐之銘撤任秉公參奏以儆官邪而資整頓將此由六百里諭令知之○申諭刑部持平議罪○命議政王會同醇郡王訓練京營○予安徽傷亡翰林院編修宋夢蘭祭葬世職○乙未諭內閣前因繙譯副考官富廉擅帶私人入闈交部嚴加議處茲據吏部奏稱富

廉於入閨時擅將伊孫及通曉繙譯之張二私行帶入寶屬有干
例禁都察院左副都御史富廉著照部議革職以昭炯戒考試爲
掄才大典科條具在例禁禁嚴嗣後考官有衡文之責者務當奉
公守法恪謹將事毋得違例妄行自取咎戾○曾國藩奏前湖北
撫臣胡林翼由翰林起家洊歷外任蒙 先皇帝特達之知由貴
州道員不及半載擢署湖北巡撫當是時武漢已三次失陷湖北
州縣大半淪沒兵勇潰散胡林翼發益陽私家之穀以濟軍食士
卒爲之感動會湘勇自江西援鄂軍勢日振六年十一月攻克武
漢以次恢復黃州等郡縣論者以爲鄂省巡撫可稍息肩矣胡林
翼不少爲自固之計悉師越境圍攻九江克復堅城殺賊淨盡爲
東南一大轉機潯功甫蒞復奏明以全鄂之力辦皖北之賊並派
重兵越二千里援解湖南寶慶之圍援湖之師未返又議大舉圖

皖先滅髮匪保三吳之財賦雪敷天之公憤繪圖數十紙分致臣
與官文暨諸路將領晝夜諮謀十年春閒大戰於潛山太湖相繼
克之遂定圍攻安慶之策親駐太湖督勦本年回援鄂省病中猶
屢寄書縷陳勿撤皖圍力勦援賊之策故安慶之克實胡林翼
爲首功也自七年以來每遇捷報之摺胡林翼皆不具奏恆推官
文與處主稿偶一出奏則盛稱諸將之功而已不與焉其心兢
兢以推讓僚友扶植忠良爲務外省盛傳楚師協和親如骨肉而
於胡林翼之苦心調護或不盡知也胡林翼於七年春閒冊議減
漕嚴裁冗費蒙先皇帝硃批獎諭統計湖北減漕一項每年爲
民間省錢一百四十萬串爲帑項增銀四十二萬兩又節省提存
銀三十一萬餘兩利國利民但不利於中飽之蠹向來各衙門陋
規各局浮費革除殆盡州縣徵收正課不准浮取毫釐亦不准借

催科政拙之名爲猾吏肥私之地各釐卡委員日有訓月有課批
答書函娓娓千言以爲取民贍軍使商賈皆知同仇而敵愾是卽
所以教忠多入少出使局員皆知潔己而奉公是卽所以興廉貞
白之士樂爲之用欺飾之徒譴責不恕故湖北瘠區養兵六萬月
費至四十萬之多而商民不疲吏治日懋斯又精心默運非操切
之術所得與也自八月以來安慶克復江鄂肅清方幸全局振興
便可長驅東下不圖大功未竟長城遽頽臣與該故撫共事日久
相知頗深咸豐四年曾奏稱胡林翼之才勝臣十倍近年遇事諮
詢尤服其進德之猛不敢阿好溢美亦不敢沒其忠勳謹將該故
撫以死勤事大略情形據實瀆陳伏祈飭付國史館查照施行至
胡林翼之子胡子勳讀書聰慧可否加恩之處出自逾格 鴻慈

上諭曾國藩奏已故撫臣忠勤盡瘁勳績最多一摺已故湖北

巡撫胡林翼由翰林起家仰荷 皇考大行皇帝特擢封圻勦力疆場勲勞懋著業經加恩追贈賜卹並入祀賢良祠以褒忠盡茲據奏陳胡林翼自擢鄂撫數載以來恢復本境援勦鄰氛整軍經武以死勤事綜其生平功業允宜亟予表揚著卽宣付史館以光簡冊胡林翼之子胡子勲並著賞給舉人准其一體會試以示朕褒獎蓋臣至意○諭官文李續宜奏官軍勦退豫捻襄陽府屬全境肅清一摺豫省捻匪竄至湖北光化縣屬攔馬河三尖山等處圖擾河口經官文等飭令署知縣喬雲苓會同團紳並水陸各軍分途截擊該逆分竄至穀城縣之太平店仙人渡均州之靈應界小江口遇黃頂等處經各該州縣文武督率兵練並水師合力截擊該逆處處受創卽逃回豫省之淅川內鄉鄧州一帶遠遁襄陽府境一律肅清勦辦甚爲妥速所有出力員弁兵勇著官文等擇

尤保奏○曾國藩奏總兵王明山等克復池州府後於八月十一
十二等日率領水陸各軍由池州下勦先將銅陵縣東北門外隄
埂決開我水軍卽於決口駛入王明山等分路進攻各軍相繼登
城殺賊千人餘匪由北門竄逃遂將銅陵縣城克復追勦十餘里
斬殺無算卽派軍駐守銅陵至濱江之無爲州爲蕪湖金陵援賊
所必經之路利在速攻該逆先於泥汊口神塘河各紮石壘以阻
我師因派候補知府陳湜等帶領兵勇由廬江進攻無爲曾國荃
帶領親兵及蕭孚泗等陸師會同王明山等水師順流下駛馳抵
泥汊口登岸見賊壘高踞口內倚水爲險曾國荃率親兵至楊家
橋一帶開挖隄埂以期四面合圍賊匪遂向無爲州遁去各軍追
殺無數遂將泥汊口克復曾國荃復帶水陸各營進攻神塘河賊
壘王明山以大礮晝夜轟擊各軍直撲壘濠奮力勦殺賊棄壘而

逃我軍俘馘尤眾旋將神塘河克復王明山乘勝進攻無爲州城先令精兵潛伏南門外而自率萬化林李朝斌等分攻大東門等處逆眾大潰遂於北門竄出水陸各軍會合追擊殺斃二千餘人入城接殺無遺無爲含山之交有運漕鎮者外瀕大江內通巢湖賊糧皆聚於此洪酋李酋率黨數千在彼踞守曾國荃偵知賊勢驚惶督率各軍進取運漕黃翼升等排礮轟擊各師船飛槳而進奪賊礮船十一隻焚燒賊船數十號船上之賊登陸奔竄各軍分途猛追斃賊三千餘人奪獲賊糧二千餘石餘賊向銅陵牯一路而遁黃翼升等派水陸各營進取東關賊眾傾巢出迎水師排礮轟擊陸師列陣數里槍礮甫施該逆狂奔不復歸壘我軍奪取石壘並獲米糧甚夥運漕鎮東關遂一併克復此次水陸各軍連克城鎮要隘從此廬州巢縣三河踞賊糧援路梗勢必漸漸搖動擬

苗陸軍九千分守無爲運漕及蒼頭東關等處並添調淮揚水師
數營分布協守可期穩固 上諭此次水陸官軍旬日之間連克
兩城並攻克巨鎮各要隘剿辦甚屬得手水陸出力員弁兵勇著
留國藩查明保奏○曾國藩奏官軍攻克無爲州運漕鎮後距江
甯僅二百里本可乘賊情驚惶之際直擣金陵老巢無如曾國荃
一軍深入賊之腹地得一處須守一處見分守安慶樅陽廬江無
爲運漕東關六處人數尙嫌單薄別無進取之兵應令曾國荃趕
緊回湘添募六千人來皖替守各城抽出見在守兵進剿巢縣和
州等處冀與都興阿揚州之師聯爲一氣庶幾剿辦易於得勢
上諭議政王軍機大臣等曾國藩所部水陸各軍自攻破無爲州
運漕鎮後相距江甯僅二百里自應亟乘賊情驚惶之際直擣金
陵老巢據該督奏稱曾國荃一軍深入賊之腹地見在安慶樅陽

廬江無爲等處分守人數尙單著曾國藩卽飭令曾國荃趕緊回
湘添募新勇來皖替守各城俾乘勝得力各軍迅卽進剿巢縣和
州等處與揚州水陸各軍聯爲一氣規克江南見在金陵賊勢如
何該大臣作何進止如何布置攻取之策李續宜彭玉麟見皆駐
軍何處並著隨時詳悉奏聞壽州被苗沛霖攻入袁甲三兵力一
時未足力制盼望楚師殊爲急切該大臣務當迅催彭玉麟帶兵
前往以冀挽回皖省大局將此由六百里諭令知之○諭田興恕
奏石逆大股已竄過湖南綏甯縣屬之青林界延長安堡麻龍一
帶等語石逆由廣西竄入楚界雖由粵西剿辦窮蹙希圖竄逸亦
由皖鄂逆匪屢次敗衄暗糾石逆勾結粵西股匪冀擾楚界牽掣
我軍自應合力痛剿以杜詭謀田興恕旣派成應洪帶隊駐紮楚
黔邊界卽著飭令會同毛鴻賓派出各軍並江忠義所帶兵勇相

機會勦江忠義身任黔撫又在湖南本籍帶兵勦賊尤當面面兼顧不可稍有疏懈一俟楚省肅清再赴新任劉長佑派臬司劉坤一等截勦獲勝卽飭越境追勦不使回竄如此三面夾擊聲威聯絡石逆旣進退失據其餘黨必可窮蹙潰散於楚黔等省甚有裨益務當和衷會商斷不可此進彼退使該逆得以乘閒竄逸將此由六百里各諭令知之○開復前任大學士翁心存革職畱任處分命以大學士銜管工部事○丙申諭內閣爲政之要首在得人前據胡林翼嚴樹森張芾潘祖蔭等先後具摺保舉人員昨前任大學士翁心存亦有臚舉人才以供任使之奏洵屬當務爲急不失以人事君之義各摺畱中備覽所保諸人業有降旨宣召及擢用者餘俟隨時徵起同資郅治用副朕側席興賢至意○以文煜覆奏查辦盜劫各案鋪張支飾切責之○丁酉諭內閣翁心存奏

自陳衰病懇辭管理部務一摺翁心存著仍管理工部事務遇有該部應行引見人員加恩免其帶領一切應派差使並著免其開列銜名以示體恤○諭議政王軍機大臣等前據薛煥奏常熟賊目錢安邦與蘇州城內之賊李文炳卽李紹熙均欲投誠同獻城池該撫先措銀十五萬兩交永昌鎮團董徐佩瑗密辦並擬分隊由高資等處三路進攻等情薛煥籌辦招撫規復蘇州自係確有把握始行入告乃爲時已閱三月之久未據將辦理情形續行奏報蘇城久陷於賊民不聊生見在李文炳等是否真心投誠團董徐佩瑗如何接應官軍已否分路進攻所需銀十五萬兩如何籌措著薛煥一面密速妥辦一面迅速馳奏該撫惟當就見有兵力密約各路同時並舉如李文炳等真心就撫則必盼望官軍甚切總當速籌布置斷不可坐失機宜也將此由六百里諭令知之○

閩浙總督慶端等奏報剿平莆田縣匪黨報聞○戊戌諭議政王
軍機大臣等慶端奏浙江軍務緊急見已趕籌軍餉擇期起程各
等語浙江紹興蕭山府縣城池失陷杭州萬分危急左宗棠旣已
行抵廣信著卽星馳入浙將衢嚴等處匪徒速行掃蕩進援省城
毋稍遲緩李元度林文察兩軍卽著左宗棠會同慶端催令前進
應由何路分投進剿以分賊勢並著妥爲調派安肅道劉于浚水
勇三千名知府丁峻之彭奇全軍一千四百名向稱得力見值江
西地方肅清卽著毓科迅速調赴浙省不得稍存畛域之見致有
貽誤總兵秦如虎見在江西並著毓科催令將前募楚勇招回一
併統帶赴浙並酌給糧餉左宗棠等兵餉著慶端毓科遵照前旨
源源接濟其鮑超一軍能否派令援浙並著曾國藩妥籌調派左
宗棠抵浙後自可將各路援軍斟酌調遣分投攻剿如該京卿已

經入浙該督卽遵前旨於閩浙交界地方駐紮爲援浙諸軍後路
聲援兼顧閩省防務其所調漳泉等處兵勇仍著飛催赴浙以資
得手松陽等處賊匪卽催已革道員張啟煊拔隊速往堵剿將此
由六百里各諭令知之○庚子諭內閣勝保奏督軍截剿竄匪情
形一摺勝保之軍攻破延家營賊巢後餘賊又復糾約濮范殘捻
合夥肆擾經勝保派令總兵成祿副都統烏勒興阿等分帶馬步
各隊跟蹤追剿該匪晝夜狂奔至臨清境內之大營河口爲我軍
追及併力截殺匪眾遺棄輜重紛紛搶渡落河淹斃甚多我軍繞
出賊前迎擊勝保趕赴威縣行至下堡寺正值賊眾亡命狂竄該
大臣親督小隊迎剿都司張遇祥等由尖莊帶隊前來策應勝保
督戰自未至酉三時之久將賊大股擊退竄向雞澤曲周一路我
軍跟蹤追剿至馬灘龍灘一帶擒斬甚多該匪悉數遁入民圩死

力抗拒適營總訥恩德善等帶領新調黑龍江馬隊趕到隨同成
祿等馬步各隊會合進戰因馬隊新到未能得力正在相持勝保
親督各軍前進都司銜宋憬詩帶隊趕至奮力衝殺復將匪眾全
股擊敗餘匪向曲周西南塔子溝奔竄仍著勝保督飭諸軍迅將
此股敗殘餘匪一律殄盡毋令蔓延管帶黑龍江頭起馬隊營總
卽補協領訥恩德善帶隊不力著先行摘去頂帶以示薄懲前任
梁山營都司張遇祥殺賊捐軀著照陣亡例從優議卹都司宋憬
詩屢立戰功此次追賊奮勇著以參將卽行補用宋憬詩甫經自
拔來歸卽能戰功卓著用特破格超升以昭激勸嗣後各路軍營
於悔罪投誠匪犯悉准寬其既往予以自新其有縛斬賊目來獻
及隨同官軍殺賊立功者各該大臣隨時奏請獎勵候朕施恩用
示朝廷廣大寬仁有功必錄至意○諭議政王軍機大臣等護理

浙江提督陳世章及王履謙奏紹興蕭山諸暨俱陷甯郡危迫省城萬緊請調兵援應各摺片甯波雖見辦防堵惟紹郡既陷勢恐不支且杭城縶卵未有一旅應援之師張玉良收合各營本屬潰軍糧藥俱盡豈能與賊持久力解城圍此時惟有左宗棠一軍能由常玉山一路飛速進兵取道三衢與李元度一軍設法援杭尙爲切近著曾國藩左宗棠迅卽妥籌務遵前旨星速馳援毋稍延緩慶端聞尙未督兵出省杭甯情形萬分緊急閩浙海道可通務將派援浙省兵勇及糧餉鉛藥先由海道駛運甯波出賊不意抑或應水陸分道設法赴援之處卽著該督迅籌辦理李元度一軍見在衢州並著曾國藩左宗棠飭令與入浙楚師會合分剿迅解杭圍克復紹郡賊踞江浙膏腴之地勢將聯成一片若再使得肆志西合杭州東連甯郡則窟穴愈成根柢愈固東南大局愈將不

可收拾諒該大臣等定不視同隔膜致蹈遷延貽誤之咎將此由
六百里加緊各諭令知之○詔中外保薦得實者加懋賞○予安
徽殉難州判朱金甲祭葬世職○辛丑 上詣觀德殿 大行皇
帝几筵前行月祭禮○諭內閣王履謙奏賊匪大股攻陷蕭山諸
暨紹興府城相繼失陷一摺王履謙以在籍大員幫辦團練平時
漫無布置臨難倉皇出城厥咎已無可追乃摺內竟有並無統兵
之責縱欲收集隊伍無奈呼應不靈各等語飾詞委卸居心尤屬
巧詐若照所請予以嚴議尙不足以蔽辜前任都察院左副都御
史王履謙著卽革職拏問交曾國藩查辦如查有棄城逃避情事
卽行嚴參治罪紹興等處文武各員下落並著曾國藩王有齡查
明迅速具奏○諭議政王軍機大臣等嚴州之賊陷桐廬富陽後
據王履謙奏該匪勾通王有齡所用之八槳礮船將賊渡至臨浦

旋犯蕭山提督饒廷選與藩司林福祥本係統兵防守諸暨一路
嗣將防兵一萬餘名全數調赴蕭山之義橋等處僅畱老弱殘卒
不滿二千以致諸暨被陷調守紹郡之八槳船在昌安門外焚搶
知府廖宗元調處不善誤受微傷自此兵民成仇人心渙散賊匪
攻紹興府城該員督團巷戰斃匪多名因賊眾勇單致被攻陷等
語王履謙幫辦團練一籌莫展委過於人著曾國藩將所奏各情
查明參奏饒廷選林福祥究在何處駐紮知府廖宗元如何調處
不善以致兵民解體王履謙是否督團接仗均查明迅速具奏原
摺著鈔給閱看浙江全省糜爛已極該大臣務遵歷次寄諭飭左
宗棠等軍迅入浙境以解省圍而維大局將此由六百里諭令知
之○壬寅諭內閣福濟奏懇請叩謁 梓宮一摺雲貴總督福濟
由翰林游擢侍郎旋因獲咎褫職我 皇考大行皇帝棄遐錄用

復擢安徽巡撫辦理軍務種種乖謬貽誤以致地方糜爛蒙 先
皇帝再造之恩僅予處分未經治罪嗣又擢任將軍朕御極之初
復簡放雲貴總督疊經諭令查辦事件並諭各直省督撫毋庸來
京叩謁 梓宮迨該督具摺陳請復催令迅赴新任該督自應以
地方爲重兼程前往將應辦事件次第辦理方爲不負委任乃於
接奉後仍折回西安專差遞摺懇請仍准叩謁 梓宮並稱滇黔
軍務諸多棘手非奏牘所能罄述必須泥首闕廷詳細面陳於拜
摺後竟自起程北上而於查辦事件並催令赴任諭旨無一字提
及覽奏不勝駭異福濟接奉前次毋庸來京叩謁 梓宮諭旨已
可不必奏請迨經接奉批摺後豈尙未能深悉其故爲是曉曉瀆
請卽滇省軍務事多棘手何難於到任後詳細籌畫密封上陳今
該督並未行抵新任豈能悉知其情形卽以面陳爲請不候諭旨

擅自北上顯係心存畏葸飾詞取巧福濟以屢經獲咎之員受

兩朝知遇厚恩當此軍務喫緊不思力圖報效輒敢巧爲嘗試實

堪痛憾若竟予革職轉得置身事外福濟著革去總督賞給四品

頂帶仍飭迅赴雲南交新任總督潘鐸差遣儻再不知愧奮必當

重懲治罪○詔各省以勇丁補營兵缺額○賞潘鐸二品頂帶署

雲貴總督

由降調湖南布政使署

○癸卯諭內閣御史鍾佩賢給事中孫楫

奏請將載垣等造作之諭旨銷除各摺片載垣等假傳諭旨造作

贊襄政務名目並於御史董元醇條奏一摺擬旨時擅自改寫各

情形業經疊次降旨明白宣示矣茲據該給事中等奏載垣等造

作擅改之件不應載之實錄儼同顧命亦不應登之冊籍假

託綸音擬請降旨銷除以期信今傳後等語朕奉母后皇太后

聖母皇太后懿旨所奏不爲無見載垣等種種悖逆欺蒙之罪

中外臣民皆已備悉所有造作贊襄政務諭旨確係矯傳自不應纂入實錄中惟違將其銷燬又恐無以示將來而徵罪案至董元醇所奏一摺當日發交載垣等擬旨原令其將所請垂簾暫理朝政飭令廷臣會議其請於親王中簡派一二人輔弼開具空名諭旨祇候簡派並於大臣中擇其可充師傅之任者公同保舉乃載垣等奏對時卽已曉曉置辯及擬諭旨遂敢陽奉陰違擅自改寫一切駁斥迨述旨時未卽允照所擬宣發而載垣等膽敢於次日發交摺件壓閣不辦竟將所擬諭旨堅請發下又以未用御印不足爲憑再行瀆請斯時駐蹕木蘭遠距京師未能卽日回鑾若不暫允所請載垣等跋扈情形其勢將有不可問者是以隱忍姑從將所擅擬諭旨鈐蓋御印實出於不得已言念及此能無痛憾所有載垣等矯傳贊襄名目及擅擬駁斥董元醇諭旨著卽銷除

惟此案係王大臣大學士六部九卿等於內閣會同刑部議定罪名伊等造作之諭旨二道卽著內閣刑部隨同本案檔冊錄存以著信讖並著軍機處卽隨此次諭旨照錄一分存檔月錄一分交南書房收存均著低二格書寫以示區別庶使奸邪逆迹不得濶載方策以重綸音而昭炯戒○諭議政王軍機大臣等有人奏捻匪屢犯山東河南請飭各路進剿直擣賊巢一摺逆捻以徐毫等處爲巢穴山東河南附近地方疊被竄擾雖節經官兵截剿總未大受懲創該匪每出無不飽掠而歸蹂躪居民實堪痛憾若使各路官兵跟蹤追躡直逼賊巢何至爲害無已乃從前各統兵大臣每以該匪僥倖出境苟安目前並不通籌全局爲擣穴擒渠之計糜餉勞師迄無底止見在僧格林沁勝保剿辦曹州東昌等處土匪均已得手著卽會同譚廷襄迅將山東各股匪徒痛加剿洗若

於年內殲除淨盡卽移得勝之師前進直擣徐亳擒匪老巢袁甲
三駐軍臨淮近日並無捷奏所部兵勇豈可任其逍遙自在著卽
督飭李世忠等將附近賊圩剋期攻拔昨毛昶熙奏稱冬令匪不
出巢是歸德情形已不甚喫緊並著會商嚴樹森督兵進剿攻取
亳州鄭元善計已帶兵出省著嚴樹森飭該司會同張曜等軍由
汝光一帶協力進攻該大臣等身受國恩總當不分畛域密速定
期各路同時大舉直擣老巢痛殲醜類方是一勞永逸之計也原
摺著鈔給閱看將此由六百里諭令知之○以礦砂不繼停烏嚕
木齊鼓鑄○以故克勤郡王慶惠子晉祺襲爵○甲辰諭內閣僧
格林沁等奏勦辦壽張等處會匪連獲勝仗並圍攻范縣督勦棍
匪情形一摺會匪劉前等盤踞壽張迤西之竹口等處經僧格林
沁令國瑞帶領馬隊於本月初一等日進攻該匪拌命抗拒官軍

馬隊槍箭幫同進擊翼長舒通額副都統舒明安等前往督勦連日跟蹤追壓斃匪甚眾將簸箕營賊圩焚毀餘匪歸併竹口一處官軍大隊衝壓追殺三十餘里斃匪四五千名該逆仍死守賊圩遊擊蔡連秀等用地雷將圍牆轟塌一齊進攻竹口圍圩全行踴毀其范縣踞匪經副管恆齡等前往圍攻梁山等處亦經道員盧朝安前往清理民圍至運河迤南棍匪盤踞澗頭集一帶著該大臣卽飭令副都統德楞額等會合吳棠兵勇跟蹤追勦務將首要擒獲毋任滋蔓○諭前因御史曹登庸奏參山東巡撫譚廷襄藩司清盛等情降旨交僧格林沁查辦茲據查明覆奏本年八月間擒匪東竄該撫所帶官兵僅止數千未可輕敵譚廷襄督兵固守省垣係爲慎重起見趵突泉在城外土圍以內該撫在彼住宿於調度亦屬相宜並未訪有攜妾情事惟王觀澄辦事遲鈍童正詩

辦事乖謬前經該大臣嚴參係奉 旨分別勒休降調之員該撫仍將該二員派赴東昌帶勇實屬委用非人譚廷襄著交部議處王觀澄童正詩著飭令來京由吏部帶領引見皇華館設局捐輸該委員等如果辦理得宜何至怨聲騰沸著譚廷襄嚴飭委員等嗣後務當妥爲勸導不准稍有抑勒清盛之父前任刑部郎中柏齡帶伊孫往泰山燒香住居書院由泰安縣豫備公館雖查無收受程儀確據究屬不知檢束清盛於伊父遊山不能諫止亦難辭咎柏齡清盛均著交部嚴加議處前任泰安縣知縣方振業於藩司之父前往泰山輒爲豫備公館亦屬有意見好著交部議處其臨清州知州張延齡章邱縣知縣屠繼烈厯城縣知縣吳載勳既據僧格林沁派員查訪並無滙銀至京交該司之父收受實據著毋庸議○諭議政王軍機大臣等僧格林沁奏直隸河南山西山

東欠解餉銀請飭迅解等語僧格林沁糧臺月餉前已欠發至三四月之多見在馳勦東昌曹州等處教會各匪兵力尙形不敷必須另行添募壯勇分路攻勦迅速掃蕩若能餉足兵強次第殲除則直隸等省邊界無防堵之費文煜等豈可心存膜視屢催罔應著文煜嚴樹森英桂將欠解各餉陸續迅速籌撥儘再遷延不解必當照新定章程懲處其山東欠解十月分餉銀三萬兩亦著譚廷襄迅卽籌撥以濟要需將此由六百里各諭令知之○詔軍營保舉人員文職不得多於武職○命安徽巡撫彭玉麟幫辦欽差大臣袁甲三軍務○予山東陣亡副都統舒明安祭葬世職○調察哈爾商都牧羣馬一千解僧格林沁軍○乙巳冬至 上詣觀德殿 大行皇帝几筵前行大祭禮○欽奉 母后皇太后 聖母皇太后懿旨金八件著改用黃銅鍍金輿轎什件等項著改用

鐵鍍銀繖扇旗纛金頂著改用黃銅以昭節儉○諭內閣袁甲三奏攻剿捻粵二逆連戰皆捷克復來安縣城一摺捻匪竄踞來安復句結粵逆來城接守並搬運米糧爲久踞計十二月二十四日李世忠派副將李昭宸等拔隊進剿適粵逆後隊尚未入城官軍左右包鈔逆勢不支紛紛驚潰我軍偪城築壘城內粵捻齊出分撲官軍分隊繞襲賊後腹背夾攻斃賊一千六七百名生擒一百餘名二十七日江浦六合之賊來援李昭宸等攔頭截擊賊眾散亂官軍乘勢壓下餘賊奔向江浦六合潰去二十八日城內之賊見官軍攻其東北兩門併力趨救我軍於西門設伏梟過城壕安設雲梯遊擊李顯爵首先登城參將杜宜魁等各率健勇分門而上伏軍擁進爭先入城該逆潰向南門遁去我軍追殺二十餘里當將縣城收復共計斃賊三四千名生擒五六百名陣斃僞丞相

總制將軍指揮等三十餘名來安久爲賊踞復與全椒逆匪相爲
犄角經官軍痛加剿洗克復堅城洵足申天討而寒賊膽所有在
事尤爲出力之儘先副將李昭宸王茂元均著免補副將以總兵
記名簡放參將杜宜魁著免補參將以副將儘先補用並俟補缺
後以總兵升用遊擊李顯爵陳元發均著免補遊擊以參將儘先
補用李顯爵並賞給銳勇巴圖魯名號陳元發並賞加副將銜其
餘出力員弁兵勇著與滁全解圍案內存記各員一併查明奏請
獎勵○丙午諭內閣勝保奏截擊西竄教匪疊獲全捷一摺直隸
山東交界等處教匪勾結邱縣等處習教愚民糾合萬餘人於十
一月十二三四等日由塔子橋一帶意圖西竄經副都統明慶等
督帶馬隊馬勇連夜繞出賊前副將黃得魁等帶領步隊緊躡其
後勝保復由威縣間道親赴曲周廣平一帶督剿十四日賊由廣

平府南竄撲綿亘二十餘里我軍奮力衝殺賊眾潰亂紛紛敗退十五日該逆乘風雪迷漫之際悉眾來撲我軍列陣進剿賊隊不能西竄遂捨命來戰復經明慶等分南北兩路夾攻逆眾膽落向東回竄馬步兵勇一齊殺入賊陣明慶等復由趙兒寨等處追殺成祿等由李窩等處夾擊追剿一晝夜殲斃馬賊甚多步賊剿殺殆盡餘匪由莘縣奔逃剿辦尙爲得手仍著督飭各軍乘勝進攻務絕根株教匪頭目是否潛逃並著實力搜捕毋任漏網○諭議政王軍機大臣等袁甲三奏苗沛霖未能帖然歸順已派員前赴六安迎探楚師約會夾擊繳回前次寄去明發諭旨並稱賈臻才不勝任各等語捻首張落刑欲渡淮河經袁甲三諭令苗沛霖截剿未肯允從其存心叵測顯而易見彭玉麟身任皖撫見復幫辦袁甲三軍務於剿辦苗練事宜責無旁貸著卽設法馳赴潁壽會

同袁甲三妥爲辦理並多帶楚勇以資得力賈臻所帶兵勇見在
乏人統率一俟彭玉麟到穎派有妥員接辦卽行覆奏以便明降
諭旨飭將該布政使送部引見再有人奏安徽按察使張學醇福
建汀漳龍道徐曉峯所得軍功多係冒濫張學醇以知縣帶勇剋
扣餉銀捐升知府與苗沛霖結拜兄弟委曲逢迎不顧大局徐曉
峯帶兵圍攻余家圩三月之久未獲一匪迨該匪遠竄後卽以攻
破賊圩具稟等語軍營人員剋扣餉銀冒稟邀功最爲可憾張學
醇如有逢迎苗沛霖以致該練日益橫行之事尤應嚴加根究著
袁甲三彭玉麟將該二員被參各款密速查明從嚴參辦原奏著
鈔給閱看正在寄諭間據勝保馳奏豫省安陽湯陰境內被捻匪
吳錫潰竄擾已派烏勒興阿等帶兵往剿卽飭成祿順道前往接
應一俟賊氛擊退卽往穎州等語苗沛霖安心叛逆而仍以求撫

爲辭以緩我軍攻勦彭玉麟務卽揀選精銳速籌馳赴穎壽其懷遠等要隘著袁甲三督同李世忠等嚴密布置一俟彭玉麟及成祿等官兵到皖自可相機籌辦將此由六百里各諭令知之○諭勝保奏侍郎國瑞帶隊攻竹口捻圩屢攻未下兵勇被傷甚多僅燒毀范縣城關民房殺斃被裹難民而於城內屯踞捻匪分毫未損范縣竹口各圩皆劉占考黨與業已相約一律就撫原可不煩兵力此時最重者皖省大股捻逆暨苗沛霖一事其次則濮范河口及早收復以杜南捻渡河北竄之路勝保一軍似不應爲此牽制至朝萃冠館一帶富戶良民竟有不惜重貲捐爲白蓮教名目者仍須實力按捕請飭譚廷襄仍駐東昌國瑞駐紮朝萃境內儻僧格林沁能親紮東昌北面不至空虛更可放心南下總期年內趕到皖豫境內等語劉占考果能決意投誠則濮范兩處已在我

掌握之中國瑞旣未能立時攻克糜餉老師終恐無益若將所帶之兵駐朝北境內搜捕餘匪可以弭後患而淨根株其范縣竹口各圩卽著勝保派得力將弁前往收撫僧格林沁譚廷襄是否能親紮東昌一帶並著酌度情形妥速議奏如國瑞一軍尙能得手則招撫劉占考更有把握是否可以移撤抑或添兵助勦力圖攻克卽著咨會勝保辦理該大臣等共辦一事務當和衷商榷方能裨大局切勿各存意見也將此由六百里各諭令知之○諭勝保奏派記名總兵成祿帶兵一千名由豫赴潁收撫各圩並將李世忠等稟函呈覽各等語吳正誼潘塏均盼勝保南下而苗營公稟語涉跋扈李世忠謂苗沛霖卽勉強就撫事後必有反覆實屬洞悉情形此時惟有懾以兵威並將附和各圩收撫以孤其勢則勦撫均易措手勝保卽督催成祿洪貞謙等統帶官兵速行南下

聲言大軍不日可到一俟到潁後卽將附近潁壽各圩責以大義結以厚恩次第收撫令苗沛霖之勢日孤或跋扈之心稍戢其應否勦辦由袁甲三等酌度情形妥爲辦理至北路軍務極關緊要勝保務將直東交界賊匪迅速掃蕩俾地方悉就肅清再議南下毋致顧此失彼將此由六百里諭令知之○文惠以病免轉伊精阿爲禮部左侍郎以存誠爲禮部右侍郎

由馬蘭鎮總兵遷

○丁未諭內

閣前因粵匪藉教滋事以致鄉曲惑於異說自罹法網我

皇考

大行皇帝憫念顛愚罔知覺悟特親書 皇祖宣宗成皇帝欽定

四言韻文

命武英殿勒石搨印頒行天下各直省將軍督撫府

尹學政督飭地方文武官員及各學教官欽遵宣布兼令官紳士

庶摹勒刊刻以廣流傳直省大小官吏自必敬謹奉行第恐日久

視爲具文奚以正人心而厚風俗見在各省會教各匪尙未寢息

亟宜廣爲化導以警愚頑著各直省將軍督撫等恪遵 皇考諭旨將前次刊刻韻文責成各官紳於學宮書院認真宣講並選各學生員分赴城市鄉鎮家喻戶曉俾共知名教之可樂一切誕妄不經之說無從煽誘正人心而閉邪說庶蒸蒸日上理也每月朔望宣讀 聖諭廣訓仍照例行將此通諭知之○諭前因軍務未竣將才需人諭令各路統兵大臣及督撫畱心諮訪無論巖棲谷隱均得上列刻章因思吏治與軍務相爲表裏吏治得人則民生安居樂業軍務自有起色近年吏治廢弛封疆大吏率以奔走逢迎稱爲能員其悃愾無華者該督撫等往往目爲迂拙未列上考昨已超擢天津府知府石贊清爲順天府府尹用樹風聲俾知觀感著各省督撫畱心訪察如有循良素著樸誠愛民者卽行臚列事實專摺保奏候朕錄用至寒畯之士或德行醇備或學問

淵通伏處山林未經登用朕延攬人才如恐不及著各該督撫學政公同諮訪無論舉貢生監以及布衣韋帶均准其據實保奏候朕徵召以廣登進之途其間濫拜師生誼聯年世以及攀援姻戚等情兼有以遊譽公卿馳驚虛名者概不准徇情濫保用副朕崇實黜華至意○諭給事中高延祐奏各省更調州縣請飭部嚴定章程等語前因該給事中奏請嚴懲貪墨業經降旨令各直省毋得率行更調茲據奏稱處分之例不嚴大吏無所儆畏所奏不爲無見嗣後各直省自道府以至州縣著該各督撫破除情面嚴加甄別有貪鄙無恥昏庸不職者卽行參革其尙無大過者或以原品休致或以佐貳雜職降補其各省州縣無論奏調委署代理每三月彙奏一次由吏部嚴行查覆如有違例更調等弊卽將該省督撫藩司分別參奏○改重窩盜分贓罪名○己酉諭內閣駱秉

章奏官軍進勦眉州連獲大勝力解城圍一摺李逆巨股盤踞眉州松江口等處聯營百餘里經路秉章調派各軍由西路進勦十月初一日先將張鞍子逆壘蹋平並將快活山賊營攻破其象耳寺之賊焚巢宵遁初六日官軍移營徑趨城南擊退關墳壩等處出撲逆匪復將黃中壩伏賊擊敗初九日總兵胡中和等分隊進攻東瓜場賊匪斬馘一千餘名過河窮追復斃賊二千餘名追抵場口破卡焚燒斃賊無算復將李逆援賊擊退當將東瓜場勦平十一日各軍分道會勦直抵徐家沖接殺附近村舍伏賊連接數仗共斃賊四五千名知府曾傳理等奪橋而進焚毀賊壘二十餘座賊奔入大壘我軍隨後直奪壘門縱火燔其劉家祠堂賊巢適我軍復進攻鐵門坎焚燒多壘從劉家祠左夾擊斃賊萬餘總兵黎得盛等攻其水寨斃匪一千餘名賊棄船奔逃我軍涉河將賊

船焚燒並奪獲破船二十八隻民船一百三十六隻徐家沖等處之賊均棄隘潛遁退竄青神辦理尙屬得手著駱秉章卽飭帶兵各員乘勝進剿務期盡殲醜類毋畱餘孽○諭議政王軍機大臣等每年年終頒賞內外各大臣等福字原爲各大臣經年辦公謹慎勤勞特恩頒賞以期共占祥瑞永承錫福見值 皇考文宗顯皇帝大事未逾期年若卽賞給福字不惟朕心追念 先徽實有未安卽爾大臣等俱受 皇考深恩亦必無賀歲之意除在京王大臣及各將軍督撫等應俟二十七箇月後再行賞給外其各路統兵大臣辦理軍務宣力行間勤勞倍著應賞福字荷包等物著本年暫停賞給俟期年後再行照前頒賞將此寄知各路統兵大臣其當感慕 皇考深恩副朕倚畀之意勤奮從公以期永受多福○諭 皇考文宗顯皇帝大故尙未周年除應行賞給在京王

大臣及各省將軍大臣福字俟二十七箇月後再行照例賞給外
新疆非內地可比所有應行賞給該將軍大臣等福字荷包等物
本年暫行勿庸賞給朕明年周年後再行照前賞給將此寄諭西
北兩路將軍大臣等傳諭各城大臣共戴 皇考之恩仰副朕倚
任之意務各奮勉趨公常受其福○諭駱秉章奏眉州賊黨卯逆
由太平場竄合李黨而王周各逆遂分擾銅梁璧山永川大足等
縣旋竄合州朱逆旋竄定遠擾近南充岳池廣安各州縣王周曹
張各逆亦復陸續竄往道員張由庚所部兵力太單查楚軍僅萬
餘人無可抽撥川中兵勇雖多難期得力請飭官文等卽令劉嶽
昭來川等語李逆分股四出竄擾剽疾異常駱秉章兵力不敷勦
辦自係實在情形且四川爲湖北上游如果川省迅速蕩平則楚
北益形安謐見在隨州已克湖北肅清更應先其所急著官文李

續宜卽飭劉嶽昭率所部果後營趕緊前赴四川交駱秉章分撥
勦辦以期迅掃逆氛肅清蜀境將此由六百里諭令知之○庚戌
諭內閣譚廷襄奏憑陳山東省虧空積弊請嚴行查覈分別勒限
清釐一摺山東省吏治廢弛往往藉口災緩諉卸催科不力處分
並可影射侵漁其軍需墊款則以已徵到官之錢糧那移墊辦捏
造報銷強行列抵經年累月不能清算據該撫查明咸豐七年以
前交代應行追賠虧款至七十一萬有奇其七年以後積壓二百
數十起其中那墊虧空更復不少及委員監算盤查惟以開報初
參了事玩泄侵蝕庫儲日虧積習相沿殊堪痛憾著譚廷襄督飭
藩司先將通省軍需那抵各款立限趕緊清釐再將交代逐案句
稽自七年以後截至本年十月初一日以前作爲舊案飭局統行
調算勒限四箇月一律清結儻有前任狡執延宕後任故意畱難

立即從嚴參辦除抵下欠之項全數提追如有不完查鈔治罪所
有累年交代遲延各員應得處分著俟此次清釐以後再行分別
辦理其本年十月初一日以後新案通限以四箇月爲斷其有兩
任交代倉穀較多者照例推展如屆期不結卽分別撤任勒追扣
補停委以示懲儆其軍需墊款概不准以正項錢糧扣抵儻敢徵
存不解無論銀數多寡立予創懲並將該管道府一併參處以肅
官方至各直省州縣積弊相沿鮮不藉蠲緩錢糧墊辦軍需爲蒙
混侵吞地步山東一省如此他省可知著各直省督撫遵照此旨
一體勒限清釐各州縣交代務使完欠分明不准稍有蒙混如有
應任交代清楚者准其破格保獎其平日剝削官項見復阻撓挾
制以冀搪抵者一經查出奏請加等治罪其軍需墊用各款尤宜
飭令覈實開報不准牽混以重庫儲○諭議政王軍機大臣等色

克通額等奏俄國商人擅往蒙古各旗貿易等情並續交槍礮意
涉推諉各一摺並將發給照會等鈔錄呈覽俄羅斯人擅向蒙古
扎薩克各旗游牧處貿易實屬不遵和約並將達什等毆打凡事
不肯與派出管理商民事務官員商辦並欲於哲布尊丹巴呼圖
克圖之廟左近租賃房屋居住種種情節均屬背約據該大臣等
請飭總理各國事務衙門查照定章辦理見已諭令恭親王等將
所奏各節照會該國駐京之巴里玉色克詳細究詰令其嚴飭該
國領事官不得擅向蒙古各游牧貿易並任意滋事一經辦有頭
緒卽當由恭親王等札行該大臣等知悉惟該國商人情勢兇橫
色克通額等於未接札文以前務須妥爲防範設該商人等再有
不法總應以遵守和約等語妥爲開導以免別滋事端至呈送槍
礮係該國自行願送非由中國索取見除已到槍礮業由該大臣

等起解運京其餘未到槍礮儻該國領事官飾詞推諉該大臣等
卽無庸再向詢問以示大方其守候運送之官兵駝隻等卽令各
回游牧俟運送時再行調取可也將此諭令知之○命王夢齡來
京以五品京堂候補以吳棠爲江甯布政使兼署漕運總督督辦
江北糧臺○辛亥諭內閣恭親王奏特參大員卑鄙鑽營請旨嚴
審一摺據稱本月二十六日自軍機處散直有見任兵部侍郎慶
英到府求見形色張皇略談數語卽向懷中取出金錢二包懇求
收納經該親王再三拒絕堅不收回旋自將其見在因案由兵部
議以降二級調用奏底呈出並有彼時荒唐未將動用銀兩報部
以致被議俟具奏時惟祈格外恩典等語王以該侍郎係屬糊塗
或因貪戀官職起見因多方開導並加以厲色拒絕冀其知所愧
悔乃該侍郎長跪不起叩求收納又稱因見王清苦勤勞持此爲

贈非徒專爲干求輒媚情形有不堪言狀者旋即倉皇趨出經王
將其呈出奏底並金錢二包一併呈覽奏請審辦各等語恭親王
曾經 先皇帝簡任樞廷平日公廉謹恪眾所共知自兩宮 皇
太后特授爲議政王矢勤矢慎期與在廷諸臣共濟艱難曾不肯
以稍存私意見好於人何況苞苴賄賂慶英何人輒敢巧於嘗試
卑鄙鑽營膽大無恥其用心尤爲可惡當此朝廷清明不意儼然
卿貳之班竟尙有此卑污醜行若不從嚴懲辦何以肅政體而儆
官邪慶英著卽革職交刑部會同都察院嚴行審辦仍將其前在
葉爾羌參贊大臣任內辦理捐輸鈔產蒙混之案一併徹底根究
○諭致仕大學士祁寯藻奏請復各省駐防考取文舉人生員舊
例等語各省駐防入旗向來本有考取文舉人生員之例自道光
年間改爲繙譯將舊例停止原爲八旗人員均應諳習國語清文

以爲本務恐其因考試漢文致有荒廢見在繙譯考試各省遵行已歷有年其駐防八旗中通達漢文積學之士不克觀光誠爲可惜嗣後著於駐防繙譯科甲外仍復考取文舉人生員之例均准其鄉會試與繙譯一體錄用以廣登進該駐防八旗人等仍不得專務漢文致將繙譯國語稍涉荒廢用副朕敦本育才至意○諭致仕大學士祁寯藻奏瀝陳末見一摺所稱綏輯民心以清盜源自粵匪跳梁東南數省蹂躪殆徧推原其故總由吏治廢弛養癰貽患等語所奏不爲無見州縣爲親民之官誠能廉正勤明則吏胥不敢欺謾聽斷自無偏枉官民相信宵小潛蹤縱有竊發隨起隨滅辦理團練必不至於聚眾把持捐輸亦不至有抑勒生事如前天津縣知縣謝子澄六合縣知縣溫紹原皆以民情愛戴保衛一方生而立功歿而優卹各省州縣牧令果能悉以爲法何患地

方不臻綏謐其各省礦稅釐捐本屬利害相乘礦徒多聚無業游民尤易釀成事端除曾經奉旨辦理著有成效及業已降旨停止各礦外如有各地方私行開挖及試採各礦均著卽行停止以弭後患釐捐之設雖爲軍餉起見窮民受累實深且恐猾吏奸胥藉端抑勒侵吞除各省奏明通衢要口設立捐卡外其偏僻地面從前設有釐捐者著概行裁撤並著各該督撫查明分別應畱應撤各捐局咨報戶部以杜擾累而嚴稽覈至所稱近年捐例頻開仕途較雜由科甲出身者轉虞壅滯部選之缺及外省請補人員應量爲變通俾不至有滯礙等語著吏部妥議章程具奏又所稱原任直隸總督孫嘉淦有三習一弊之奏其言剴切深中事情著國史館檢查該故督傳全文恭錄呈覽○諭議政王軍機大臣等見在楚軍沿江掃蕩攻克無爲等州縣袁甲三亦奏報克復來安似

賊匪畏懼楚軍有思圖他竄之意都興阿一軍兵力無多萬一賊勢北竄則清淮最關緊要所有漕河兩標兵丁本爲押運防河而設見在運漕旣經暫停河工亦無防可辦則兩標兵丁正堪爲勦賊之用著吳棠督飭各營挑補足額實力操演以資堵剿漕運總督向駐淮安府城惟捻蹤如由徐州竄往山東必須經由邳宿則淮安地勢較偏自應駐紮清江庶可北顧徐宿南顧淮揚著吳棠察看情形酌量駐紮以期居中扼要至淮徐道員缺關繫緊要必得熟悉地方情形足以勦辦捻逆者方可勝任著吳棠於屬員中揀擇妥員無論道府州縣出具切實考語奏請補放不必拘定資格總以民情愛戴才能勝任爲要亦不必循例會同江蘇督撫題請以期迅速儻所保之員不能得力朕惟吳棠是問該署督本係幫辦田在田軍務見雖超擢藩司兼秉節鉞官職較田一

惟乏員可簡仍著幫辦其該處勦辦機宜務當妥爲兼顧該署督受朕特達之知開誠委任自能力矢公忠以圖報稱斷不至以官階大小稍存意見江北糧臺本係王夢齡督辦並著吳棠於接印後將江北收支各數覈實經理痛除積弊抽釐之舉不得已而借資民力然仍以保養民間元氣爲主儻有借端爲名剋剝小民藉肥私橐之員卽著吳棠指名嚴參再有人奏江蘇興化縣知縣張鵬展年力就衰信任官親家人擾害地方控案甚多署甘泉縣知縣施培孔任令伊叔候補道施燕辰盤踞公署包攬詞訟遇事貪婪各等語著吳棠逐款嚴查據實具奏原片著鈔給閱看將此由六百里諭令知之○增給五城賁賑米每日一石○壬子諭議政王軍機大臣等勝保奏勦辦大股教匪撲滅殆盡匪首窮蹙乞降並招撫濮州匪眾一摺山東匪徒西竄經勝保截回勦洗僅餘

殘匪數千由館陶渡河回竄官軍跟蹤追剿各旗匪眾望風奔逃其匿伏莘冠兩縣之匪亦俱震懾軍威悉行逃散復經該大臣督飭明慶烏勒興阿等分路擊剿該匪窮蹙已極浼出本地紳民代爲乞命情願歸正不敢復反匪徒投誠如果真心悔罪自應悉予自新第據該大臣所奏該匪等敗殘之餘尙有賊馬數千匹礮械數千件見已令其悉數交出一一遵命定日投降又稱該匪首等疊被勅洗畏懼兵威不敢徑投大營是所有賊馬礮械等件究竟曾否繳出未據聲明且所稱黃旗頭目張玉淮等分投東昌等處營盤見在是否卽赴大營投降均尙未能準定大股劉占考亦仍在濮州據稱已催王榕吉等令其乘此機會迅速歸誠似招撫全係出自該大臣之意濮州知州王元治等所造降眾名冊是否可靠該大臣務當加意詳察儻因急欲移兵南向將撫事遷就辦結

恐以後枝節旋生再事剗除更難爲力該大臣惟當慎密

求事事腳蹋實地毋令轉易卽生變端卽四一股尙在堂邑潛匿
著卽飭令烏勒興阿等迅速剿洗勿畱餘孽將此由六百里諭令
知之○轉勝保爲兵部左侍郎以聯康爲兵部右侍郎

由左副都御史遷

○以張之萬毛昶熙龐鍾璐俱爲內閣學士○癸丑諭內閣前任
兵部侍郎王茂蔭志慮忠純直言敢諫特諭議政王軍機大臣傳
至軍機處察看該侍郎自稱精神尙未復原急切恐難任事係屬
實情若遽令銷假轉非所以示體恤王茂蔭著安心調理一俟病
痊卽遞摺請安聽候簡用○諭嚴樹森奏遵查藩司玩誤廢事汎
弁棄寨逃避分別懲辦一摺已革河南布政使邊浴禮蒙 皇考
大行皇帝特達之知由河南知府不數年間擢任監司大員宜如
何激發天良力圖報稱乃自到藩司任後性耽安逸懶見屬員有

稟見二三十次而不得一面者諸務廢弛職此之故又縱容其子邊保樞在外游蕩與門丁任廷選招搖納賄眾怨沸騰該藩司不能約束實屬昏憤糊塗殊堪痛憾若僅照該撫所請革職永不敘用猶不足以蔽辜已革河南布政使邊浴禮著發往軍臺效力贖罪伊子捐納知縣邊保樞著卽行革職嚴樹森未能破除情面露章參奏實屬不合著交部議處知府羅景恬查無通札屬員厚餽貨儀情事著毋庸議朱仙鎮汛千總李嵩嶺當捻氛逼近之時輒藉寨工未竣調團堵剿爲詞思離汛地又將眷屬攜避他處實屬恒怯無能著卽革職以肅戎行○河南巡撫嚴樹森奏擒匪徐四萬等經官兵擊敗後糾眾至平輿圖句陳大濬出竄十月二十一日道員張曜督率馬步進攻平輿附近各村賊黨紛紛出拒張曜揮兵縱擊殲賊二百餘名生擒十三名我軍進逼賊圩未能得手

遂將前敵各隊移紮郭樓該處爲平輿賊匪出入要道並豫伏一軍於附近之大劉店以爲策應陳逆糾集捻黨五六千人分路直撲郭樓都司劉自順等軍亦分路迎勦馬隊鈔出賊後正在馳驟衝突伏兵陡起槍礮環施賊眾驚亂兵勇四面截殺伏屍數里陳逆奔至濠邊鳧水入寨餘匪向徐寨紛竄計斃馬步賊一千五六百名生擒老捻五十四名訊明正法其張鳳林黨與前經竄擾息縣之彎柳樹集等處該署知縣李宏藻督團往勦疊有斬擒逆匪復在息境土扶橋一帶嘯聚十月十四日分投圍攻范寨亦經兵勇擊退二十五日該匪圖撲縣城李宏藻親督團勇邀賊於城西南李家廟地方大呼陷陣手刃悍賊數名因眾寡不敵登時陣亡查陳逆負固平輿時時圖竄其黨復徧布汝正新息之交四出焚擾張曜一軍防勦正在喫緊已令激勵將士直搗賊巢翦除醜類

此時息縣匪徒勢甚猖獗並令於汝防諸軍內抽撥馬步千名派
得力營官管帶會同接署息縣知縣馮德綬相機剿辦仍催周鳳
山迅統湘勇星馳來豫會合張曜之軍先將汝正新息一帶土匪
節節掃蕩肅清內患然後進紮光固以保南園而遏鄰氛此次陣
亡之補用同知署息縣知縣李宏藻被害甚慘殊堪憫惻相應籲
懇 天恩飭部照同知陣亡例從優議卹並請於殉難地方建祠
以慰忠魂 上諭擒匪負固平輿復分布於汝正新息地方日形
滋蔓著嚴樹森督飭張曜等激勵將士直搗賊巢盡殲醜類其陣
亡之署息縣知縣李宏藻著照同知陣亡例從優議卹並於殉難
地方建祠以彰忠藎○諭慶端奏查明處州府城失陷情形見飭
分路攻剿一摺浙江逆匪由松陽下竄直撲郡城署處州鎮總兵
特保督隊迎剿眾寡不敵該逆乘勢竄入郡城著慶端卽飭派出

之游擊黃載清迅速赴援責成特保等剋期進攻收復郡城如再遷延貽誤卽將該署鎮嚴參治罪其餘文武員弁有無聞警先逃情事著慶端查明分別參處○諭議政王軍機大臣等勝保奏探聞南捻竄入東境僧格林沁恐未能赴東昌但得重兵扼紮該府使匪眾不能北渡該大臣亦卽可赴潁等語苗練蔓延潁壽極爲可慮惟東匪擾及大名開州等處事關畿輔安危尤屬緊要勝保近雖連獲勝仗而匪醜尙自披猖卽所稱劉占考等願意投誠亦未可恃乃謂直東交界將就肅清亟籌南下恐於機宜未協見已諭以北路軍務緊要不得遽請南行惟該大臣於北路情形旣存輕視卽暫緩起程亦恐於勦辦事宜諸多草率見在南捻趙浩然等股竄至何處僧格林沁如何堵截東省軍務何路最爲喫緊應如何布置方爲扼要勝保請令該大臣駐紮東昌是否可行移兵

東昌後能否扼堵該匪不令擾及直豫以固北路藩籬再籌進擣老巢肅清東境該大臣於直東情形極爲熟悉著於接奉此旨後悉心酌度迅速覆奏毋庸稍涉遷就亦不得意存推諉將此由六百里諭令知之○諭慶端奏浙省賊勢猖獗杭州危急等語浙江紹興府城失守後賊眾十餘萬圍攻杭州鮑超旣經曾國藩派赴甯國去杭最近著卽飭該總兵統率所部由於潛昌化取道星夜馳赴杭城力解城圍但能省城無虞則其餘郡邑尙可徐圖恢復事關東南大局諒該大臣必能先其所急也湖南鎮守官兵素稱驍勇著官文毛鴻賓斟酌情形調派一千名卽交千總馬朝龍管帶赴浙交秦如虎統領其應需糧餉並著寬爲籌備左宗棠是否業已督兵入浙著曾國藩迅催前進一面覆奏前諭毓科飭令道員劉于濤等帶兵援浙著毓科飛催前進毋任逗畱再據嚴樹森

奏苗練圍擾豫疆勢漸延蔓飭令副將周鳳山招集舊部赴豫等語卽著官文嚴飭該副將舊部湖南弁勇三千人剋日起程取道信陽將土匪節節掃蕩進紮光固聽候嚴樹森調遣毋稍遲誤將此由六百里各諭令知之○諭賈臻奏探聞楚師已抵六安攻破苗黨文占奎等堅圩苗逆於壽州正陽關等處添築營壘意圖抗拒儻自知各處不能堅守糾黨北趨或由阜潁犯陳或由蒙亳犯宋則楚師勢成尾追請飭彭玉麟繞道渡淮力扼北竄復據勝保奏苗沛霖必應招撫不能不親往籌辦豫省軍務急應整頓必應事權歸一方能有效並備陳差探苗練待撫情形各等語劉占考尙在濮州向背均難豫定南捻趙浩然等又欲北竄儻僧格林沁不能抵禦全恃勝保爲北路屏蔽設該大臣移師南下該匪竊發竟成鞭長莫及之勢較苗練之害尤深苗沛霖旣願就撫而復以

盼望勝保爲詞安知不俟勝保南下彼卽銳意北竄至謂該練置
粵逆僞印而未用苗沛霖曾爲監司大員豈宜接受此印見在國
服已滿百日乃仍藉持服而蓄髮未薙足見其另有詭謀卽賈臻
所奏亦謂苗沛霖萬不可撫該署撫自係見聞較切原摺著鈔給
閱看見在山東匪燄尙熾勝保惟當督飭將士實力勦辦以期漸
次肅清其投誠匪眾尤當妥爲安撫事關北路安危斷不容稍涉
大意率請南下至苗沛霖情形旣據該大臣以爲可撫自必確有
把握前寄去明發諭旨一道尙在該大臣處收存卽著寄信苗沛
霖以該練如果真心就撫卽著殺賊自效如張落刑等股匪果能
剿滅一二處則該大臣必當爲伊懇請恩施儻該練感該大臣之
恩而復懾於楚軍聲威或竟就我範圍亦未可定此時剿撫兼權
固與袁甲三彭玉麟之籌剿兩不相妨也至皖豫官兵前經 皇

考諭令統歸勝保節制事權不爲不專此時自無庸再降諭旨該大臣於河南省調兵籌餉諒該省亦斷無異言至嚴樹森身爲豫撫豫省軍務自係專責該撫辦事尙能認真何能遽易生手勝保於該撫意見未融諒因該省不得意官員意存離間而該大臣營中亦有借威福以騷擾地方者以致各不相能此等情事不可不加意詳察嗣後惟當以公事爲重不可爲浮言所惑嚴樹森前經諭令於籌餉等事不許膜視諒必能共濟時艱也將此由六百里諭令知之○諭賈臻奏聞楚兵已攻破苗黨苗練驚懼請飭迅速進兵專意主剿等語楚軍已抵六安著彭玉麟卽將攻克兩圩情形及如何籌度進剿機宜迅速馳奏苗練以求撫款我實則安心叛逆惟該練糾黨至二三十萬一聞楚軍師律甚嚴亦不能不懾其聲威此時若鼓勇直前該練眾或可瓦解儻李續宜等能先派

楚軍攻克廬郡是已扼苗逆之背而奪其所恃彭玉麟總須設法繞道渡淮力扼北竄之衝便於迎頭截擊至該練部下人數眾多被脅之徒亦當相機開導寬其助虐許以自新眾志既離剿辦自易此中操縱機宜惟在袁甲三會同彭玉麟相機妥籌不可稍涉大意再據勝保探聞粵逆寄信欲占壽城而苗沛霖再三阻止其心欲待轉圜並宣言於眾若勝保年內可到卽行薙髮歸附如其不來明年正月再聽我令舉事之語傳聞之詞恐係其中有詐目下剿撫兩端各不相背袁甲三彭玉麟仍當振耀兵威解其黨與俟該練有可撫之機再行斟酌辦理正不必惑於招撫之說致阻軍心也將此由六百里各諭令知之○諭嚴樹森奏請催提湘勇以防苗逆並藩司鄭元善等未能赴防光固情形一摺苗練叛黨偏處光固一經楚師進剿難保不乘間而趨道員張曜正在剿辦

汝甯息縣一帶賊匪未能移軍赴援藩司鄭元善見回省籌畫餉需整頓吏治自應畱省籌辦一切以專責成周鳳山募勇一時恐未能到如苗練果有西趨之信卽著嚴樹森親提省防各軍星夜援剿不得以坐待援兵置邊防於不顧儻光固有失該撫豈能當此重咎勝保剿辦東匪卽以保衛豫境該省協撥餉需務須源源接濟該大臣本係節制豫省官兵設有調遣嚴樹森亦應和衷商辦不得各存意見致有貽誤將此由六百里諭令知之○諭嚴樹森奏東省匪徒竄入豫境添兵迎擊力保河朔一摺山東另股賊匪焦克昌等糾黨竄入開州擾及滑境復分擾濬縣湯陰該處毗連畿輔亟應及早肅清嚴樹森務卽督飭將士迅速掃除並著文煜趕緊派兵於交界處所扼要防堵聯捷段晴川亦卽各帶所部兵勇鄉團馳往該處會合夾擊以期四面兜剿爲一鼓殲除之計

此股賊匪係由東省竄入直境擾及豫疆著勝保卽行分兵嚴扼直東交界以免再行西竄將此由六百里各諭令知之○諭據樂斌多慧奏籌議善後章程擬酌設營制招練番兵改定邊缺申明舊章四條以爲善後事宜又西甯爲極邊要區羌戎錯雜漢民之外則有蒙古野番熟番漢回撤回喇嘛土民種類旣繁撫循治理稍有失當枝節叢生西甯道府二缺初任人員難期熟練請均改爲調補之缺至該二缺專用滿洲蒙古人員此後但期人地相宜無論滿漢人員均准酌調升補惟同時道府二缺內必須有滿洲蒙古一人不得皆用漢員各等語麟魁屢次出差曾經涉歷該省沈兆霖曾任陝甘學政一切風土人情平日想能深悉該督等所陳四條是否爲見在善後要務抑或此中另有窒礙難行之處西甯道府二缺均係請旨簡放見在改爲調缺及滿漢人員均准升

補是否可行著麟魁沈兆霖體察情形會同商酌妥議具奏另片
所請朱百川及單內和祥以道府記名簡放係與新定章程不符
且恐該督等所保有捏報冒功徇庇私人等事均著悉心訪查秉
公覆覈具奏以杜冒濫邊陲要地所有改設營制缺分及保舉等
事均須斟酌妥善勿可草率從事也原摺片單五件均著鈔給閱
看將此諭令知之○以浙江浦江援軍潰退奪提督饒廷選職仍
畱任責令帶兵堵剿○予河南陣亡知縣黃河清祭葬世職○是
月緩徵直隸滄州等二十六州縣被旱被雹被蟲新舊額賦貸山
西駐防兵丁修屋銀